

Copyright © 1999 by IESU INNOVATION

O LE TALA LELEI IA IESU
Mai le Feagaiga Fou

UPU TOMUA

O le tusi lenei o le TALA LELEI IA IESU e mafai ona avea

1. O upu e faamasani atu ai IESU ia te oe
2. O le iloiloina o le Tala Lelei ia Iesu
3. Ma avea ma mea faigaluega e fesoasoani i le faasalalauina o le Tala Lelei ia Iesu i le lalolagi

Mo nisi suesuega ina ia e soifua ai pea, ia e faitauina le Feagaiga Fou, ma le TUSI PAIA atoa, ina ia maua ai le malamalama atoatoa ia Iesu e te mafaia, ma maua mai ai le faamanuiaga tele mai le Atua.

LENARD GALSTER

O LE TALA LELEI IA IESU

Mai le Feagaiga Fou

LENARD GALSTER

Mo lo'u toalua o Ruta ma lo'u atalii o Tavita ma Melody

Faaliliuina i le gagana Samoa e Galoane Sunia

Taase ma Apofua Tui'ai Sunia

O le faafetai faapitoa mo Viliamu ma Elisapeta

Winterstein, faapea le aulotu a le NCBC i Port
Hueneme, ma le Trinity Lutheran Church i Santa Paula
mo le fesoasoani i le lolomiina o lenei tusi

O lenei tusi ua uma ona faaliliuina i gagana eseese e
12, e aofia ai fo'i lomiga tusi mo tagata tauaso. E tele
fo'i ni isi gagana o loo galulue ai nei mo le faaliliuga.



Lolomiga 1990 e LENARD GALSTER


Mataupu mai le: TUSI PAIA

The Bible Society in the South Pacific

Tusiata o Mark Watkins

*O Le
Tala
Lelei
Ia
Iesu*

MAI LE FEAGAIGA FOU



O LE TALA LELEI IA IESU

Mai le Feagaiga Fou

O MEA I TOTONU

1. Ua afio mai le ATUA i le lalolagi e ala
ia Iesu.....7
2. O ni uiga o Iesu i lona itu tagata9
3. Ua valaauina e Iesu ni isi e fai ma
ona So'o.....13
4. Ua Aoaoina e Iesu ma faamanuiaina
ona tagata.....15
5. E avatu e Iesu ia i latou o e mulimuli mai ia
te ia o mea e manana'o i ai.....17
6. E tali Iesu i talosaga.....19
7. E faamagaloina e Iesu agasala ma
faamaloloina tagata.....21
8. E ta'ita'ina e Iesu tagata i le Atua ma le ola
e faavavau23
9. Ua saunia e Iesu le Faaolataga mo le Lalolagi....26
10. E aumaia e Iesu le Ola Fou i ona tagata33
11. E atina'e e Iesu lana Ekalesia37
12. E aveina a'e e Iesu ona Tagata i le lagi41


Vaega 1
UA AFIO MAILE ATUA I LE LALOLAGI
E ALA IA IESU

1. E afio mai le Atua i ona tagata e ala ia Iesu.

“O le tala lelei ia Iesu Keriso, o le Alo o le Atua.”
Mareko 1.1.

“Aua ua finagalo le Tama ia mau i totonu ia te ia le tumu atoatoa.” Kolose 1.19.

“A ua oo atu i le faaatoaga o tausaga, ona auina mai lea e le Atua o lona Alo, na fanau, i le fafine.” Kalatia 4.4.



2. O le uiga o le igoa “Iesu” o le Faaola mo e agasala.

“E te faaigoa foi ia te ia o Iesu; aua e faaola e ia lona nuu ai a latou agasala.” Mataio 1.21.

3. O le affio mai o Iesu le Faaola ma le Alii ua maua ai le olioli

“Ona fai mai lea o le agelu ia te i latou, Aua tou te matatau; aua faauta, ou te au mai ia te outou le tala lelei e olioli tele i le nuu uma; aua o le aso nei ua fanau ai i le aai a Tavita, lo outou Faaola, o le Alii ia o Keriso.” Luka 2.10-11.

4. Sa fanau mai Iesu, sa nofo ma galue i ni nofoaga o lo’o iai pea, e o’o mai lava i ona po nei.

“Ua fanau Iesu i Peteleema i Iutaia i ona po o Herota le tupu.” Mataio 2.1.

“Ua faafofoga Iesu ua tuuina atu Ioane i le fale puipui ona maliu atu ai lea o ia i Kalilaia; ua tuua e ia o Nasareta, ua maliu atu o ia ma nofo i Kapanauami ua tu matafaga, i le tuaoi o Sepulona ma Nafatali.” Mataio 4.12-13.

“O Iesu foi, ua faatoa oo i le tolugafulu o ona tausaga.” Luka 3.23.

Vaega 2

O NI UIGA O IESU I LONA ITU TAGATA

5. O Iesu e poto tele ma ofoofogia.

“Ua matua ofo uma lava e na faalogo ia te ia i lona poto ma ana upu e tali.” Luka 2.47.

“Ua matua ofo foi i latou i lana mataupu; aua ua ia a’oa’o ia te i latou e faapei o se ua i ai le pule.” Mareko 1.22.

“Ua latou vivii uma ia te ia, ua ofo foi i upu alofa na pau mai lona fofoga.” Luka 4.22.



6. Ua mana'omia Iesu.

“Ona mulimuli atu lea ia te ia o le motu o tagata e toatele mai Kalilaia, ma Tekapoli, ma Ierusalem, ma Iutaia, ma ona tala atu o Ioritana.” Mataio 4.25.

“Ua oo ia i Ierusalem, ona vevesi ai lea o le aai uma.” Mataio 21.10.

7. O Iesu e agamalu ma loto maulalo.

“Ia outou amoina la'u amo, ma ia outou faaa'oa'o ia te au, aua o a'u le agamalu ma le loto maulalo; ona maua lea e outou o le malologa mo outou agaga.” Mataio 11.29.

8. O Iesu e Alofa.

“Faapei ona alofa mai o le Tama ia te au, e faapea lava ona ou alofa atu ia te outou.” Ioane 15.9.

9. O Iesu e uiga fiafia

“O lea lava itu aso ua matua fiafia ai le finagalo o Iesu.” Luka 10.21.

“Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli.” Ioane 15.11.

10. O Iesu e faauoa'i

“Ou te le toe ta'ua outou a auauna, aua e le iloa e le auauna mea e faia e lona alii; a ua ou ta'ua outou o uo, aua ua ou faailoa atu ia te outou mea uma na ou faalogo ai i lo'u Tama.” Ioane 15.15.

11. E lagona e Iesu le faanoanoa mo tagata.

“Ua latalata ia, ua silafia e ia le aai, ona tagi ai lea o ia.” Luka 19.41.

“Ua matua tiga lo’u loto e oo i le oti.” Mataio 26.38.

“Ua tagi Iesu.” Ioane 11:35.

12. E mafatia Iesu.

“Ona oo ai lea o Iesu faatasi ma i latou i le fanua ua igoa ia Ketesemane; ua faapea atu foi o ia i le au soo, Ia outou nonofo iinei, seia ou alu atu iila ou te tatalo. Ua o ane o ia ma Peteru ma atalii o Sepetaio e toalua, ona tiga lea o ia ma atuatuvalet.” Mataio 26.36-37.

13. E toasa Iesu.

“Ua ia silasila solo ia te i latou ma le toasa, ina ua tiga o lona finagalo, aua o latou loto ua maaa.” Mareko 3.5.

14. Ua to’amalie Iesu.

“Pei o le mamoe ua ta’ita’iina ia fasia; pei o le tamai mamoe foi i luma o le sele fulufulu e le tagi.” Galuega 8.32.

15. E leai se agasala a Iesu.

“O le na le agasala lava, na le iloa foi se pepelo i lona fofoga.” 1 Peteru 2.22.

16. E loto faamagalo Iesu.

“Ona fetalai atu lea o Iesu, Lo’u Tama e, ia e faamagaloina atu ia te i latou; aua ua latou le iloa le mea ua latou faia.” Luka 23.34.

17. E mamana Iesu.

“Ona maliu ane ai lea o Iesu, ua fetalai atu ia te i latou, ua faapea atu, Ua tuuina mai ia te au le pule uma lava i le lagi ma le lalolagi.” Mataio 28.18.

“O ia o le pupula o lona mamalu ma ua matua tusa lava ma ia, o loo o faatumauina e ia mea uma lava i lana afioga mana.” Eperu 1.3.

18. E mamalu Iesu.

“Ona liua ai lea o ia i o latou luma, ua pupula mai ona fofoga e pei o le la, ua sisina mai foi ona ofu e pei o le malamalama.” Mataio 17.2.

“O le tietie mai foi ua pei o le maa iasepi ma le salikea lona tino mai; ua siosioina foi le nofoalii e le nuanua e pei o le samaraki lona tino mai.” Faaaliga 4.3.

Vaega 3

UA VALAAUINA E IESU NI ISI OI LATOU E FAI MA ONA SO'O

19. Ua fesili atu Iesu i ni isi oi latou e o mai ia te ia ma ia faatasi ma ia.

“Ia outou o mai ia te a’u o outou uma.” Mataio 11.28.

“O le taeao ua finagalo ai Iesu e maliu atu i Kalilaia ua na silafia Filipino, ona fetalai atu lea o ia ia te ia Mulimuli mai ia ia te au.” Ioane 1.43.

“Ua maliu ese Iesu i lea mea, ona silafia ai lea e ia o le tagata ua nofo i le fale e tali ai taulaga, o Mataio lona igoa; ua faapea atu ia te ia, Ina mulimuli mai ia ia te au. Ona tulai ai lea o ia, ua mulimuli atu ia te ia.” Mataio 9.9.



“Ua ao foi, ona valaau atu lea o ia i ona soo, ua fili-fili e ia ni o latou e toasefulu ma le toalua, ua faaigoa foi i latou e ia o aposetolo; o Simona, ua ia faaigoa atu foi ia te ia o Peteru, ma Aneterea lona uso, o Iakopo ma Ioane, o Filipino ma Patolomaio, o Mataio ma Toma, o Iakopo le atalii o Alefaio ma Simona ua igoa ia ia Selote, o Iuta foi le uso o Iakopo ma Iuta le Sekara.” Luka 6.13-16.

“O a’u nei o le malamalama o le lalolagi; o le mulimuli mai ia te au, e le savali o ia i le pouliuli, a e ia te ia le malamalama o le ola.” Ioane 8.12.

“Ona fetalai atu ai lea o Iesu i ona soo, Ai se tasi e fia mulimuli mai ia te au, aua ne’i usiusitai o ia ia te ia, a ia ave e ia lona satauro, i le mulimuli mai ai ia te au. Aua ai se fia faasaogalemuina lona ola, e maumau ai ia te ia; a o le faamaumau lona ola ona o a’u, e maua ai e ia.” Mataio 16.24-25.

“Ona fetalai atu lea o Iesu ia te i laua, Ina mulimuli mai ia ia te au, ou te faia oulua ma fai faiva i tagata.” Mareko 1.17.

“Ia outou o atu e fai nuu uma lava ma soo.” Mataio 28.19.

“A e maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalem ma Iutaia uma lava, ma Samaria, e oo lava i le tulu’iga o le lalolagi.” Galuega 1.8.

Vaega 4

O A'OA'OGA A IESU MA FAAMANUIAGA I ONA TAGATA

20. Ua a'oa'o atu Iesu i ona So'o.

“Ua silasila atu ia i le motu o tagata, ona maliu ae lea o ia i le mauga; ua nofo ai i lalo, ona o mai ai lea o ona soo ia te ia; ua ia fetalai atu, ma a'oa'o ia te i latou.” Mataio 5.1-2.

“Ua alu ane o ia ia Iesu i le po, ua fai mai ia te ia, Rapi e, ua matou iloa o oe o le a'oa'o ua maliu mai mai le Atua; aua e le mafai e se tasi ona fai o ia faailoga e te faia, ana le ia te ia le Atua.” Ioane 3.2.



21. Ua faamanuia atu Iesu ia te i latou o e mulimuli ia te ia.

“Ona siitia lea e ia o i latou i ona lima, ua faaee foi ona aao i luga ia te i latou, ma faamanuia ia te i latou.” Mareko 10.16.

“Ua ave e ia ia te i latou i tua, ua oo lava i Petania; ona sisii ai lea o ona aao, ma faamanuia ia te i latou.” Luka 24.50.

“Ia outou o mai ia te au, o outou uma o e tigaina ma mafatia i avega, o a’u foi e malolo ai outou. Ia outou amoina la’u amo, ma ia outou faaa’oa’o ia te au, aua o a’u le agamalu ma le loto maulalo; ona maua lea e outou o le malologa mo outou agaga. Aua e avegofie la’u amo, o la’u avega foi e mama ia.” Mataio 11.28-30.

“Ua ou sau ina ia latou maua le ola, ia maua atili ai lava.” Ioane 10.10.

Vaega 5

UA AVATU E IESU IA I LATOU O E MULIMULI MAI MEA LATOU TE FIA MAUA

22. Ua avatu e Iesu ia te i latou o e mulimuli mai ia te ia, le tino malosi ma le ola faaleagaga, ma mea latou te fia maua.

“Ua tago o ia i areto e lima ma i’a e lua lau, ona tepa ae lea i le lagi, ua faafetai; ona tofitofi lea i areto, ma avatu i ona soo, latou te laulau atu ai ia te i latou; ma i’a foi e lua lau ua na tufatufa atu ai ia te i latou uma.”
Mareko 6.41.



“Ua faataamilo Iesu i Kalilaia uma, ua ia a’oa’o i o latou sunako, ua ia tala’i atu foi le tala lelei o le malo, ma faamalolo e ia o ma’i uma ma ma’i tiga uma o le nuu.” Mataio 4.23.

“O a’u nei le areto o le ola; o le sau ia te au, e le laina lava ia; o le faatuatua foi ia te au, e le toe fia inu lava ia.” Ioane 6.35.

“O ia o le pupula o lona mamalu ma ua matua tusa lava ma ia, o loo o faatumauina e ia mea uma lava i lana afioga mana.” Eperu 1.3.

“A o lo’u Atua e faaatoa e ia ia te outou mea uma e matitiva ai outou, e tusa ma le faulai o lona viiga, ia Keriso Iesu.” Filipi 4.19.



Vaega 6

E TALI IESU I TATALO

23. E faalogo Iesu ma fesoasoani i e o mai ia te ia.

“Faauta foi, ua sau le lepela, ua ifo mai ia te ia, ua faapea mai, Le Alii e, a e finagalo i ai e te mafaia lava ona faamama mai ia te au. Ona aapa atu lea e Iesu o lona aao, ua pa’i atu ia te ia, ua faapea atu, Ou te loto i ai; ina mama ia oe. Ona mama loa lea o lona lepela.”
Mataio 8.2-3.



“Ua oo atu Iesu i Kapanaumi, ona sau ai lea ia te ia o le ta’ita’i o le toaselau, ua aioi mai ia te ia, ua faapea mai, Le Alii e, ua taoto la’u auauna i le fale e ma’i i le supa, ua matua tiga lava. Ona fetalai atu lea o Iesu ia te ia, O le a a’u alu atu e faamalolo ia te ia.” Mataio 8.5-7.

“Ona la fai mai ai lea ia te ia, Le Alii e, ia pupula o maua mata. Ona mutimuti vale ai lea o le alofa o Iesu, ua pa’i atu i o la mata; ona vaai loa ai lea o la mata, ona la mulimuli mai ai lea ia te ia.” Mataio 20.33-34.

“Ua vaai ia i le matagi ua tetele, ona fefe ai lea; ona afua ai lea ona goto, ua alaga, ua faapea mai, Le Alii e, ia e faaola mai ia te au. Ona aapa atu loa lea e Iesu o lona aao, ua tago ia te ia, ua faapea atu ia te ia, O oe na le faatuatua itiiti, se a le mea ua e masalosalo vale ai.” Mataio 14.30-31.

“Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona toina ai lea ia te outou.” Mataio 7.7.

“Ona tali atu ai lea o Iesu, ua faapea atu ia te ia, Funa e, ua tele lou faatuatua; e pei o lou manao, ia faapea lava ona faia ia te oe.” Mataio 15.28.

Vaega 7

E FAAMAGALOINA E IESU A LATOU AGASALA MA FAAMALOLO IA I LATOU


24. Ua faamagaloina agasala e Iesu.

“Ua silafia e ia lo latou faatuatua, ona fetalai atu lea o ia ia te ia, Sole, ua faamagaloina au agasala. Ona manatunatu lea o le au tusiupu ma le au faresaio, ua faapea ane, O ai ea lenei ua na upu leaga i le Atua? O ai na te mafaia ona faamagaloina agasala, ua na o le Atua lava? Ua silafia e Iesu o latou manatunatu, ona tali atu ai lea o ia, ua faapea atu ia te i latou, Se a le mea tou te manatunatu ai io outou loto? Po o le fea le faigofie? po o le fai atu, Ua faamagaloina au agasala; po o le fai atu Tulai ia, ina savali? A e peitai ina ia iloa ai e outou o i le Atalii o le tagata le pule i le lalolagi e faamagaloina ai agasala, ua fetalai atu ia i le supa, Ou te fai atu ia te oe, Tulai ia, ina ave lou moega, ma e alu i lou fale. Ona tulai loa lea o ia i o latou luma, ua ave le mea na taoto ai o ia, ona alu ai lea i lona fale, ua vivii atu i le Atua.” Luka 5.20-25.

“Ua fai mai o ia, Le Alii e, e leai lava se tasi. Ona fetalai atu lea o Iesu ia te ia, Ou te le faasala foi ia te oe; alu ia oe, aua e te toe agasala.” Ioane 8.11.

“Ona fetalai atu lea o Iesu, Lo‘u Tama e, ia e faamagaloina atu ia te i latou; aua ua latou le iloa le mea ua latou faia.” Luka 23.34.

“Aua o le mea lelei lea ma le malie i luma o lo tatou Faaola le Atua, o le finagalo ina ia faaolaina o tagata uma lava.” 1 Timoteo 2.3-4.



“Aua e lei auina mai e le Atua lona Atalii i le lalolagi ina ia faasala i le lalolagi, a ia faaolaina le lalolagi ia te ia.” Ioane 3.17.

25. Ua faamaloloina i latou e Iesu.

“Ua ulufale atu Iesu i le fale o Peteru, ona silafia ai lea e ia le tina o lana ava ua taoto i le ma’i vevela. Ua pa’i atu o ia i le lima o le fafine, ona te’a lava lea o ma’i vevela ia te ia; ona tulai lea o ia, ua auauna ia te i latou. Ua oo i le afiafi, ona latou au mai ai lea ia te ia o tagata e toatele ua uluitinoina e temoni; ona ia tulia ai lea o agaga i le upu lava, ua faamaloloina foi e ia o i latou uma na mamai.” Mataio 8.14-16.

“Ona latou au mai ai lea ia te ia o e ua mamai atoa uma, o e ua i ai ma’i eseese, ma e ua puapuagatia, ma e ua uluitinoina e temoni, ma e ua ma’i maliu, atoa ma e ua mamai i le supa; ona faamaloloina lea o i latou e ia.” Mataio 4.24.

Vaega 8

E TA'ITA'IINA I LATOU E IESU I LE ATUA MA FAAATOATOAINA O LATOU OLA

26. E pei o le “Leoleo Mamoe Lelei” Ua ta’ita’iina i latou e Iesu i le Atua: le Tama, le Alo, ma le Agaga Paia. (O le Atua Tolutasi,—E tasi le Atua, ae tolu ona Suafa, poo le “Tolutasi”).

“O a’u le leoleo mamoe lelei; e tuu atu e le leoleo mamoe lelei o lona ola e sui a’i mamoe.” Ioane 10.11.

“Ua fetalai atu Iesu ia te ia, O a’u nei le ala, ma le upu moni, ma le ola; e le alu atu lava se tasi i le Tama, pe a le ui mai ia te au. Ana iloa e outou o a’u, po ua iloa foi e outou lo’u Tama; e amata nei foi ona iloa o ia e outou; tou te vaai foi ia te ia. Ua fai mai Filipino ia te ia, Le Alii e, ia e faailoa mai le Tama ia te i matou, ona gata ai lea o matou manao. Ua fetalai atu Iesu ia te ia, Filipino e, ua loa lava ona ou i ai ia te outou, a e te lei iloa ea a’u? O le ua vaai mai ia te au, ua vaai o ia i le Tama.” Ioane 14.6-9.

“O a’u nei ma le Tama, e tasi lava i maua.” Ioane 10.30.

“Ou te fai atu foi i le Tama, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau; o le Agaga lea e tupu mai ai le upu moni.” Ioane 14.16-17.

“A o le Fesoasoani, o le Agaga Paia lea, e auina mai e le Tama i lo’u igoa, o ia lava na te a’oa’o ia te outou i mea uma ua ou fai atu ai ia te outou.” Ioane 14.26.

“O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia; ia outou a’oa’o atu ia te i latou ia tausi i mea uma ua ou fai atu ai ia te outou.” Mataio 28.19-20.

“O le Alii lo tatou Atua, o le Alii e toatasi ia. Ia e alofa foi i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa.” Mareko 12.29-31.



**27. E ala i ana upu, ua ta'ita'iina e Iesu i latou i le
ola atoatoa.**

“O a'u mamoe e faalogo mai i latou i lo'u leo, ua ou
ilola foi i latou, ua latou mulimuli mai foi ia te au.”
Ioane 10.27.

“Ua e ilola Tusi Paia, e mafaia ona faapoto ai ia te oe
e iu ai i le ola i le faatuatua ua ia Keriso Iesu. O Tusi
Paia uma lava e mai le Agaga o le Atua ia, e aoga foi ia
e a'oa'o ai, e aoi ai, e faatonu ai, e faapoto ai foi i le
amiotonu.” 2 Timoteo 3.15-16.

“Ona fetalai atu ai lea o Iesu i ona soo, Ai se tasi e fia
mulimuli mai ia te au, aua ne'i usiusitai o ia ia te ia, a ia
ave e ia lona satauro, i le mulimuli mai ai ia te au. Aua
ai se fia faasaogalemuina lona ola, e maumau ai ia te ia;
a o le faamaumau lona ola ona o a'u, e maua ai e ia.”
Mataio 16.24-25.

“Ua ou sau ina ia latou maua le ola, ia maua atili ai
lava.” Ioane 10.10.

“Ou te avatu foi le ola e faavavau ia te i latou; latou
te le fano lava e oo i le faavavau, e le mafai lava e se
tasi ona fao ia te i latou ai lo'u lima.” Ioane 10.28.

“Ua ou fai atu nei mea ia te outou, ina ia tumau ai
lo'u olioli ia te outou, ia atoatoa foi lo outou olioli.”
Ioane 15.11.

Vaega 9

UA SAUNIA E IESU LE FAAOLATAGA MO LE LALOLAGI

28. Ua foa'i e Iesu lona ola mo i tatou uma.

“Aua na ou tuuina atu ia te outou mea muamua o mea foi ia na ou maua foi e a'u; na maliu Keriso ma sui o a tatou agasala, pei ona tusia.” 1 Korinito 15.3.

“E leai se tasi na te aveeseina ia te au, a e peitai a'u ou te tuuina atu e a'u lava.” Ioane 10.18.

“Ona ia tuuina atu lea o ia ia te i latou, ina ia faasatauroina. Ona ave lea o Iesu e i latou, ua ta'ita'iina atu; ua ave e ia lona satauro, ua maliu atu foi i le mea e ta'ua, O le mea o i ai le ulupoo, ua igoa i le upu Eperu, o Kolokota. Ua latou faasatauro ia te ia i lea mea, atoa ma isi tagata e toalua faatasi ma ia, o le tasi i le tasi itu, ma le isi i le isi itu, a o i totonu Iesu.” Ioane 19.16-18.

“Mulimuli ane ua silafia e Iesu ua uma ona taunuu o mea uma, ua ia fetalai ane, Ou te fia inu; ina ia taunuu ai te Tusi. Sa i ai foi le fagu ua tumu i le vineta; ua latou fufui le omomi i le vineta, ua tuu i luga i le isopo, ma tuu atu ai i lona fofoga. Ua talia le vineta e Iesu, ona fetalai ane lea o ia, Ua taunuu; ua faagaugau lona ao, ona tuuina atu lea o lona agaga.” Ioane 19.28-30.

“Na maliu foi o ia ona o tagata uma.” 2 Korinito 5.15.

“A ua faaalitinoina mai e le Atua lona lava alofa ia te i tatou, ina ua maliu Keriso ma sui o i tatou, a o tatou agasala pea.” Roma 5.8.


“Aua ua outou iloa e lei togiolaina outou i mea e pala, o le ario po o le auro, nai la outou amio le aoga na tuuina mai e o outou tama; a o le toto taua o Keriso pei o lo le tama’i mamoe e le pona lava, e leai foi sona leaga.” 1 Peteru 1.18-19.

“Faauta i le Tamai mamoe a le Atua, na te aveesea le agasala a le lalolagi.” Ioane 1.29.

29. O Iesu ua avea ma ala o lo tatou faatuatua i le Atua.

“Aua ua faapea lava ona alofa mai o le Atua i le lalolagi ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau.” Ioane 3.16.

“Ma ia vaavaai atu ia Iesu o le na te ta’ita’iina ma le na te faaatoatoaina le faatuatua.” Eperu 12.2.



30. Ua laveaina i tatou e Iesu mai le pouliuli, ma le malaia.

“O ia ua na laveai mai ia te i tatou nai le pule a le pouliuli, a ua na aumaia i latou i le malo o lona lava Alo pele; o ia ua tatou maua ai le togiola i lona toto, o le faamagaloina lea o agasala.” Kolose 1.13-14.

“O lenei, ua leai se faasala i e o ia Keriso Iesu, o e le savavali i la le tino, a e i la le Agaga.” Roma 8.1.

“E moni, e moni, ou te fai atu ia te outou, o le faalogo mai i la’u upu, ma talitonu ia te ia na na auina mai a’u, ua ia te ia le ola e faavavau; e le oo foi ina faasalaina o ia, a ua oo atu ia i le ola, sa i le oti.” Ioane 5.24.

31. Ua faamagaloina e Iesu o a tatou agasala ma faamamaina i tatou uma.

“Ua silafia e ia lo latou faatuatua, ona fetalai atu lea o ia ia te ia, Sole, ua faamagaloina au agasala.” Luka 5.20.

“O lea na tiga ai Iesu i tua o le faitotoa o le aai, ina ia faapaiaina ai e ia o le nuu i lona lava toto.” Eperu 13.12.

“O le toto foi o Iesu Keriso lona Alo e faamamaina ai i tatou i agasala uma lava.” I Ioane 1.7.

32. Ua ta’utino mai e Iesu, “Tatou te le agasala.”

“A o i agasala e tele le mea e foaifuaina mai, ina ia ta’uamiotonuina.” Roma 5.16.

33. Ona o Iesu, ua matua ola ai o tatou agaga.

“A o le Atua, ua i ai le faulai o le alofa, ona a lona lava alofa tele na ia alofa mai ai ia i tatou, a o oti lava i

tatou i amio leaga, ua na faaola mai ia i tatou faatasi ma Keriso.” Efeso 2.4-5.

“Ua fanaufouina outou e le o le fua e pala, a o le fua e le pala lava, o le afioga a le Atua lea ua ola ma ua tumau e oo i le faavavau.” 1 Peteru 1.23.

“A ua faalia mai le agalelei ma le alofa i tagata o lo tatou Faaola le Atua, ona faaola mai ai lea o ia ia i tatou, e le ona o galuega o i le amiotonu sa tatou faia, a e tusa ma lona lava alofa i le faataeleina i le toefuataina ma le faafouina e le Agaga Paia.” Tito 3.4-5.

34. Ua ta'uamiotonuina i tatou i le Atua, e ala i lo tatou faatuatua ia Iesu.

“Aua e le ta'uamiotonuina se tagata e toatasi i ona luma i galuega o le tulafono; aua o le tulafono e iloa lelei ai le agasala. A o lenei, ua faaalua mai le amiotonu a le Atua, e le o i ai le tulafono, ua molimau i ai e le tulafono atoa ma le au perofeta; o le amiotonu lea a le Atua i le faatuatua ia Iesu Keriso, e oo i tagata uma, ma ua le oo le viiga mai le Atua; ua ta'uamiotonuina fua i lona alofa tunoa i le togiola e a Keriso Iesu.” Roma 3.20-24.

“A o le ua le galue, a e faatuatua i le na te ta'uamiotonuina le ua faalemata'u, ua ta'ua lona faatuatua o le amiotonu.” Roma 4.5.

“Aua o ia na le iloa le agasala, na faia lea e ia ma agasala o le sui o i tatou; ina ia avea i tatou ma amiotonu a le Atua ia te ia.” 2 Korinito 5.21.

35. Ua faasaoina i tatou e Iesu mai le to'asa o le Atua, ma ua tatou faalelei ai ma ia.

“O lenei, ua ta'uamionuina nei i tatou i lona toto, e le faaolaina ea i tatou e ia ai le toasa i se a?” Roma 5.9.

“O lenei, ua ta'uamionuina i tatou i le faatuatua, o lea ua tatou lelei ai ma le Atua, ona o lo tatou Alii o Iesu Keriso.” Roma 5.1.

36. Ua faato'ilaloina e Iesu le tiapolo, ma le malosi o le oti.

“Ina ua i ai le fanau le tino tagata ola, na faapea foi ona ua i ai ia te ia, ina ia faaumatia e ia i lona maliu o le ua i ai le malo e oti ai, o le tiapolo lea, ma tuusaunoaina ai i latou uma o e na faapologaina i o latou olaga uma ona o le mata'u i le oti.” Eperu 2.14-15.

37. Ua fai i tatou ma uo a Iesu.

“Aua afai ua lelei i tatou ma le Atua i le maliu o lona Alo ina o fai i tatou mona fili, e matua faaolaina lava i tatou i lona soifua.” Roma 5:10.

“I lona tino tagata, ina ua maliu, ina ia tuuina atu outou e ia, ole au paia, o e le mata'uleagaina, ua leai foi se mea e faasalaina ai i ona lava luma.” Kolose 1.22.

38. Ua filifilia i tatou e Iesu, e avea ma ona tagata.

“Ua le filifilia a'u e outou, a ua filifilia outou e a'u.” Ioane 15.16.

“A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai,

ina ia outou ta'uta'u atu ona lelei na ia valaau ia te outou nai le pouliuli e oo i lona lava malamalama e matua ofo ai." 1 Peteru 2.9.

"Ua faatauina outou i le tau, aua ne'i avea outou ma pologa o tagata." 1 Korinito 7.23.

39. E alofa Iesu ia i tatou.

"E le sili lava le alofa o se tasi i lenei alofa, ia tuuina atu e se tasi lona ola e sui a'i ana uo." Ioane 15.13.

"E faapea lava ona ou alofa atu ia te outou." Ioane 15.9.

40. E faamaloloina i tatou e Iesu.

"O ona faalavalava ua malolo ai i tatou." 1 Peteru 2.24.

41. E maua e i tatou le olioli mai ia Iesu.

"Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli." Ioane 15.11.

"Amuia e ua faamagaloina o latou solitulafono, ma ua ufitia a latou agasala." Roma 4.7.

"A ua olioli lava le motu o tagata uma ona o ia mea silisili uma na faia e ia." Luka 13.17.

"Na o lenei tou te olioli ai, ina ua tusia o outou igoa i le lagi." Luke 10.20.

42. Ua saunia e Iesu lo tatou nofoaga i le lagi.

"E tele mea e nonofo ai i le maota o lo'u Tama; ana

leai, po ua ou fai atu ia te outou; ou te alu e sauni se mea e nonofo ai outou.” Ioane 14.2.”

43. Ua saunia e Iesu le ola e faavavau mo ona tagata.

“Aua o le oti, o le totoigi lea o le agasala; a o le ola e faavavau, o le mea foaifuaina mai lea e le Atua, i lo tatou Alii o Keriso Iesu.” Roma 6.23.

“Ou te avatu foi le ola e faavavau ia te i latou; latou te le fano lava e oo i le faavavau, e le mafai lava e se tasi ona fao ia te i latou ai lo’u lima.” Ioane 10.28.

“Ua fetalai atu Iesu ia te ia, O a’u nei o le toe tu ma le ola; o le faatuatua mai ia te au, e ui lava ina oti, a e ola lava ia. Poo ua e talitonu mai ea i lena mea?” Ioane 11.25-26.

“Ona fetalai atu ai lea o Iesu is te ia, E moni, ou te fai atu ia te oe, o le aso ta te faatasi ai ma oe i parataiso.” Luka 23.43.”

44. Ua avatu e Iesu le faaolataga i le lalolagi.

“Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau.” Ioane 3.16.

“E leai foi se tasi ua i ai le ola; e leai lava se isi igoa i lalo o le lagi ua foaiina mai i tagata e mafaia ona fao-laina ai o i tatou.” Galuega 4.12.

“Ua fetalai ane Iesu ia te ia, Ua oo mai le faaolataga i le aiga nei i le aso.” Luka 19.9.

Vaega 10

UA AUMAI E IESU LE OLA FOU

I ONA TAGATA

45. Ua toe tu mai Iesu na i le oti, ma faailoa atu i ona soo.

“Ua fetalai atu Iesu ia te ia, Funa e, se a le mea e te tagi ai? O ai ea e te sailia? A o le fafine, fa te ia o le leoleo ia o le fanua, ua fai mai ia te ia, Le alii e, afai ua ave ese ia te ia, ta’u mai ia ia te au po o fea le mea ua tuuina ai o ia; ona ou aveeseina lea o ia. Ua fetalai atu Iesu ia te ia, Maria e. Ona faliu lea o ia, ua fai mai ia te ia Raponi e, (o lona uiga, Le a’oa’o e.)” Ioane 20.15-16.



“E le o iinei o ia; aua ua toe tu mai o ia, pei ona fetalai atu ai o ia. O mai, ina matamata i le mea na tuu ai le Alii. Ina o atu ia ia vave, lua te ta’u atu i ona soo, ua toe tu mai o ia nai e ua oti; faauta foi, e muamua atu ia ia te outou i Kalilaia; tou te iloa ai o ia i lea mea; faauta, ua ou fai atu ia te oulua. Ona la vave o ai lea nai le tuugamau ma le fefe ma le fiafia tele; ua la taufetuli e ta’u atu ai i ona soo, faauta foi, ua fetai ai Iesu ma i laua, ua faapea atu, Si o’u alofa. Ona la o mai ai lea ua fetagofi i ona vae, ma ifo mai ia te ia.” Mataio 28.6-9.

“E fagafalu po ua iloa ai o ia e i latou, Na faailoa atu foi o ia e ia ia te i latou ua soifua ia, ua faamaonia i faailoga faamaoni e tele; ma na fetalai atu i mea a le malo o le Atua.” Galuega 1.3.

“Aua na ou tuuina atu ia te outou mea muamua o mea foi ia na ou maua foi e a’u; na maliu Keriso ma sui o a tatou agasala, pei ona tusia; na tanu foi o ia, ma toe tu mai i le aso tolu, pei o upu ua i Tusi. Na iloa foi o ia e Kefa, ona iloa lea e le toasefulu ma le toalua. Ona toe iloa lea o ia e le au uso e lima selau ma ona tupu ina ua faatasi.” 1 Korinito 15.3-6.

“E mulimuli lava ona iloa o ia e a’u nei.” 1 Korinito 15.8.

46. O le toe tu mai o Iesu, ua maua ai e i tatou le ola fou.

“Ou te ola a’u, o le mea lea e ola ai outou.” Ioane 14.19.

“O le mea lava lenei ua faaalua mai ai le alofa o le Atua ia te i tatou, ina ua auina mai e le Atua lona Alo e toatasi i le lalolagi, ina ia tatou ola ia te ia. O le alofa lava lenei, e le ona ua tatou alofa i le Atua, a ua alofa mai o ia ia te i tatou, ua na auina mai foi lona Alo o le togiola mo a tatou agasala. Le au pele e, afai ua faapea ona alofa mai o le Atua ia te i tatou, e tatau ai ona tatou fealofani.” 1 Ioane 4.9-11.

“A e ou te le toe ola a’u, a o Keriso o loo ola i totonu ia te au.” Kalatia 2.20.

“Aua o le oti, o le totogi lea o le agasala; a o le ola e faavavau, o le mea foaifuaina mai lea e le Atua, i lo tatou Alii o Keriso Iesu.” Roma 6.23.

“E le mafai e ia mea ona faateaseina mai i tatou i le alofa o le Atua, o loo ia Keriso Iesu lo tatou Alii.” Roma 8.39.

“A ua tatou manumalo aiai i nei mea uma lava, ona o ia ua alofa mai ia te i tatou.” Roma 8.37.

“O lenei, se a sa tatou upu i nei mea? Afai ua au ma i tatou le Atua, o ai se faasaga tau mai ia i tatou? O ia lava sa na le faasaoina lona lava Alo, a ua tuuina mai o ia e sui a’i i tatou uma lava, e le foai fua mai ea e ia ia te i tatou mea uma lava faatasi ma ia i se a?” Roma 8.31-32.

“O lenei, ua leai se fasala i e o ia Keriso Iesu.” Roma 8.1.

“Na maliu foi o ia ona o tagata uma, ina ia le usiustai pea o e ola ia te i latou, a o ia o le na maliu ma toe tu mai o le sui o i tatou.” 2 Korinito 5.15.

“E tele mea e nonofo ai i le maota o lo’u Tama; ana leai, po ua ou fai atu ia te outou; ou te alu e sauni se mea e nonofo ai outou. Afai foi ou te alu ma sauni se mea e nonofo ai outou, ou te toe sau, ou te talia foi outou ia faatasi ma a’u; ina ia i ai outou i le mea ou te i ai a’u.” Ioane 14.2-3.

“Ona fetalai atu ai lea o Iesu ia te ia, E moni, ou te fai atu ia te oe, o le aso ta te faatasi ai ma oe i parataiso.” Luka 23.43.

“Ia faafetaia le Atua, le Tama o lo tatou Alii o Iesu Keriso o le na fanaufouina i tatou ona o lona alofa tele, ina ia iu i le faamoemoe ua ola, i le toe tu mai o Iesu Keriso nai e ua oti, ia iu i le tofi e le pala, e leai se leaga o i ai. e le mamae lava, o loo teu i le lagi mo i tatou.” 1 Peteru 1.3-4.

“E le o iloa atu outou ia te ia, a ua alolofa ia te ia; e le o vaai atu nei foi ia te ia, a o loo faatuatua ia te ia, tou te olioli ai ma le fiafia e le matalatalaina, e silisili ese lava; e maua foi le iuga o lo outou faatuatua, o le faoalaina lea o outou agaga.” 1 Peteru 1.8-9.

Vaega 11

UA ATI A'E E IESU LANA EKALEZIA

47. Ua ati ae e Iesu lana ekalesia.

“Ou te ati ae foi la’u ekalesia.” Mataio 16.18.

48. Ua faaogaina e Iesu upu ua tusia e faalia ai o ia.

“Ona faamatala ai lea e ia ia te i laua o mea ua tusia ia te ia i Tusi uma” Luka 24.27.

49. Ua ia fetalai mai, ou te aumai ia te outou o e faatuatua ia te ia.


“A ua tusia ia mea, ina ia talitonu ai outou, o Iesu o le Keriso lava ia, o le Alo o le Atua; ina ia maua ai foi le ola i lona suafa e outou o e talitonu.” Ioane 20.31.

“O le agaga lea e tupu ai le ola, e le aoga le tino i se mea; o upu ou te fai atu ia te outou, o le agaga ia, o le ola foi ia.” Ioane 6.63.

“Aua o le mana lava lea o le Atua e ola ai i latou uma o e faatuatua.” Roma 1.16.

50. Ua auina mai e Iesu le Agaga Paia e fesoasoani i ona tagata.

“A maliu mai le Fesoasoani, o le ou te auina mai ia te outou mai le Tama, o le Agaga lea e tupu mai ai le upu moni, o le maliu mai mai le Tama, o ia lava e moli-mau ia te au. Tou te molimau foi.” Ioane 15.26-27.



“A e maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalema ma Iutaia uma lava, ma Samaria, e oo lava i le tulu’iga o le lalolagi.” Galuega 1.8.

51. Ua fesoasoani atu i latou o e molimau ia Iesu, e folafola atu le tala lelei i soo se mea.

“Ua afua i lea lava Tusi ona folafola ia te ia o le tala lelei ia Iesu.” Galuega 8.35.

“Ua le mapu foi i latou i aso uma ona a’oa’o atu, ma tala’i atu i le malumalu, ma lea fale ma lea fale le tala lelei ia Iesu Keriso.” Galuega 5.42.

“Ona logo atu loa lea o le tala ia te ia i le nuu uma o Kalilaia.” Mareko 1.28.

“O lenei, ia outou o atu e fai nuu uma lava ma soo.” Mataio 28.19.

52. Ua olaola le ekalesia a Iesu.

“Ua tupu foi le afioga a le Atua; ua matua faa-toateleina le au soo i Ierusalema.” Galuega 6.7.

“Ua faaopoopoina i le ekalesia e le Alii i aso fai soo o e ua faaolaina.” Galuega 2.47.

“Na ia tuuina mai foi nisi e fai ma aposetolo, o isi foi e fai ma perofeta, o isi foi e folafola le tala lelei, o isi foi e fai ma leoleo atoa ma a’oa’o; ina ia faaatoatoaina ai le au paia, latou te fai ai le galuega a auauna, ia atiina ae ai le tino o Keriso.” Efeso 4.11-12.

53. Ua taua i latou o e talitonu o Kerisiano.

“Na uluai igoa foi le au soo o Kerisiano i Anetioka.”
Galuega 11.26.

54. Ua iloa atili e le au Kerisiano Iesu.

“A ia tutupu outou i le alofa tunoa ma le potō i a lo
tatou Alii o lo tatou Faaola lea o Iesu Keriso.” 2 Peteru
3.18.

Vaega 12

UA AVEINA AE E IESU ONA TAGATA I LE LAGI

55. **Ua siitia ae Iesu i le lagi i le mamalu ma le mana.**

“Ua fetalai atu ia i ia mea, ona siitia lea o ia, o latou o vaavaai atu; ua avea foi o ia i le ao nai o latou luma.” Galuega 1.9.

“O le tietie mai foi ua pei o le maa iasepi ma le salikea lona tino mai; ua siosioina foi le nofoalii e le nuanua e pei o le samaraki lona tino mai.” Faaaliga 4.3.

“Ua tuuina mai ia te au le pule uma lava i le lagi ma le lalolagi.” Mataio 28.18.

56. **E toe afio mai Iesu.**


“O Iesu lena, ua aveina ae nai ia te outou i le lagi, e faapea ona toe afio mai o ia, pei o lona afio atu i le lagi na outou vaavaai i ai.” Galuega 1.11.

“Faauta, o loo afio mai o ia ma ao, e iloa atu foi o ia e mata o tagata uma.” Faaaliga 1.7.

“Aua e pei ona emo mai o le uila i sasae, ma malamalama atu i sisifo; e faapea foi ona sau o le Atalii o le tagata.” Mataio 24.27.

“E faailoa mai lea mea e ia i ona lava aso, o ia o le Alii e manuia mona ua toatasi, o le Tupu o tupu, ma le Alii o alii.” 1 Timoteo 6.15.

“Faauta, ou te vave alu atu.” Faaaliga 22.7.



57. E toe afio mai Iesu ma faatutu i e ua oti.

“Ou te fai atu ia te outou, e oo i le aso, ua oo nei foi i ai, e faalogo mai ai e ua oti i le leo o le Atalii o le Atua; o e faalogo ai foi, e ola ai i latou.” Ioane 5.25.

58. E liua e Iesu ona tagata i le olioli.

“Faauta mai, ou te ta’u atu ia te outou le mea lilo; e le momoe i tatou uma, a e liua i tatou uma, e faafuasei lava, o le emo o le mata, pe a ilia le pu faauma; aua e ilia lava, e toe tutu mai ai e ua oti ma le ola pea, e liua foi i tatou. Aua e tatau ona ofu o lenei tino iu vale i le tino ola pea, ia ofu foi lenei tino oti i le tino le oti lava.”
1 Korinito 15.51-53.

“Aua o lo tatou nuu moni ua i le lagi lea, o loo faatalitali mai ai i tatou i le Faaola, o le Alii o Iesu Keriso; na te liua o tatou nei tino ua leaga, ina ia faia ia faataata i lona tino matagofie.” Filipi 3.20-21.

“Le au pele e, o le fanau i tatou a le Atua i nei ona po, a e lei faaalua mai nei le uiga o i tatou a amuli; a ua tatou iloa, pe a faaali mai o ia, ona foliga ai lea o i tatou ia te ia, aua tatou te iloa tino ai lava o ia.” 1 Ioane 3.2.

59. Pea afio mai Iesu, o le a faaumatia le lalolagi nei, ae toe faafouina mea uma lava e le Atua.

“A e sau le aso o le Alii pei o se gaosi i le po, e mavaeeseina ai le lagi ma le gogolo tele, e te’a eseese ai foi o mea na fai a’i ina ua mu; o le lalolagi foi ma galuega o i ai e susunuina lava.” 2 Peteru 3.10.

“A e faatalitali i tatou i le lagi fou ma le lalolagi fou, pei o lana na folafola mai, e mau ai le amiotonu.” 2 Peteru 3.13.

“Ua fetalai mai foi le tietie i le nofoalii, Faauta, ou te faia ia fou mea uma lava.” Faaaliga 21.5.

60. Ua saunia e Iesu se nofoaga mo ona tagata i le lagi.

“E tele mea e nonofo ai i le maota o lo’u Tama; ana leai, po ua ou fai atu ia te outou; ou te alu e sauni se mea e nonofo ai outou.” Ioane 14.2.

“Ona a’u iloa lea o le lagi fou ma le lalolagi fou; aua ua mavae atu le uluai lagi, ma le uluai lalolagi, ua leai foi se toe sami. O a’u foi o Ioane na ou iloa le aai paia, o Ierusalem fou, ua alu ifo mai le Atua i le lagi, ua saunia pei o se faatoanofotane ua teuteuina mo lana tane. Na ou faalogo foi i le leo tele mai le lagi, ua faapea mai, Faauta, ua faatasi ma tagata le fale fetafai o le Atua, e mau foi o ia ma i latou; e fai foi i latou mona nuu, e ia te i latou le Atua lava o lo latou Atua ia. E soloiesea foi e le Atua loimata uma i o latou mata; e leai foi se toe oti, po o se faanoanoa, po o se aue, e leai foi se toe puapuaga; aua ua mavae atu mea muamua.” Faaaliga 21.1-4.

“Ua ia avea foi a’u i le Agaga i le mauga tele ma le maualuga, ua ia faaali foi ia te au Ierusalem, o le aai tele ma le paia, o loo alu ifo i le lagi mai le Atua, ua i ai le pupula o le Atua; o lona pupula foi e pei o se maa

taua lava, e pei o se maa iasepi i lona faatioata mai”
Faaaliga 21.10-11.

“O le ala tele foi o le aai o le auro lelei lea, e pei o le
tioata manino.” Faaaliga 21.21.

“Ou te lei iloa ai foi se malumalu; aua o lona
malumalu o le Alii le Atua lea, e ona le malosi uma
lava. E le aoga foi i le aai ona pupula i ai o le la, po o le
masina; aua o le pupula o le Atua ua faamalamala-
maina ai ia, o le Tamai mamoe foi o lona lamepa lea.”
Faaaliga 21.22-23.

“Ona faaali mai lea e ia ia te au le vaitafe manino o
le vai o le ola, e manino e pei o le maa tioata, ua tafe ifo
mai le nofoalii o le Atua ma le Tamai mamoe. O i le
moa o lona ala tele ma itu taitasi o le vaitafe le laau o le
ola, o lau foi o le laau e faamalolo ai nuu. E leai foi se
toe faafano e tasi.” Faaaliga 22.1-3.

61. E aveina ae e Iesu lava ia ona tagata i le lagi.

“Ou te toe sau, ou te talia foi outou ia faatasi ma a’u,
ina ia i ai outou i le mea ou te i ai a’u.” Ioane 14.3.

“Pe a sau le Atalii o le tagata i lona mamalu, ma le
au agelu paia uma faatasi ma ia, ona tietie ai lea o ia i
lona nofoalii mamalu; e faapotopotoina foi i ona luma
o nuu uma lava; ona tuueseeseina lea o i latou e ia, e pei
o le leoleo mamoe ona tuueseeseina o mamoe ma oti;
ona tuu ai lea e ia o mamoe i lona itu taumatau, a o oti i
lona itu tauagavale. Ona fai atu ai lea o le Tupu i e o i
lona itu taumatau, O mai ai, o outou ua faamanuiana e

lo'u Tama, ua fai mo outou tofi le malo ua saunia mo outou a o lei faavaeina le lalolagi." Mataio 25. 31-34.

"Ona fai atu foi lea o ia i e o i lona itu tauagavale, O outou ua faafanoina, o ese atu ia ia te au i le afi e faavavau, ua saunia mo le tiapolo ma ana agelu." Mataio 25.41.

"Ona o atu ai lea o i latou na i le sala e faavavau; a o e amiotonu e o atu i le ola e faavavau." Mataio 25.46.

"Ona fetalai atu ai lea o Iesu ia te ia, E moni, ou te fai atu ia te oe, o le aso ta te faatasi ai ma oe i parataiso." Luka 23.43.

"Faauta foi i le motu o tagata e toatele mai atu nuu uma, ma aiga, ma nuu, ma gagana eseese, e le ma faitaulia e se tasi, o loo tutu i latou i luma o le nofoalii ma luma o le Tamai mamoe, ua oofu i latou i ofu sisina, ua i ai foi lau pama i o latou lima; ua latou alalaga foi ma leo tetele, ua faapea atu, O i ai le faaolataga i lo tatou Atua o le tietie i le nofoalii, atoa ma le Tamai mamoe. Ua tutu faataaliolio agelu uma i le nofoalii ma le au toeaina ma mea ola e fa, ua latou faapau fao i luma o le nofoalii, ma ifo atu i le Atua, ua faapea atu, Amene; Ia i lo tatou Atua le faamanu, ma le viiga, ma le poto, ma le faafetai, ma le malosi e faavavau faavavau lava. Amene." Faaaliga 7.9-12.

62. Faai'uga.

"Aua o lo'u ola ua ia Keriso lea; a o lo'u oti, o lo'u manuia lea. Afai ou te ola i le tino, o le fua lea o la'u

galuega; a ou te le iloa po o le fea mea ou te filifilia. Aua ua ou faaletonu i manatu e lua; o loo ia te au le naunau ia ou alu, ia faatasia a'u ma Keriso; o le mea lea e sili ona lelei. Peitai ia a'u tumau i le tino, o le mea lea e sili ona aoga ia te outou." Filipi 1.21-24.

"E fai foi outou ma molimau ia te au i Ierusalema ma Iutaia uma lava, ma Samaria, e oo lava i le tulu'iga o le lalolagi." Galuega 1.8.

"Ia alualu lo outou faamalosi i le galuega a le Alii ma le le aunoa." 1 Korinito 15.58.

"Ma ia vaavaai atu ia Iesu o le na te ta'ita'iina ma le na te faaatoatoaina le faatuatua." Eperu 12.2.

"O lenei, ia ia te ia na te mafaia ona leoleo ia te outou ina ne'i pauu, ma tuuina atu ia te outou ua le pona i luma o lona lava mamalu ma le fiafia tele, ia i le Atua potō e toatasi o lo tatou Faaola, le viiga ma le mamalu, o le malosi ma le pule, i nei ona po, ma ia oo i le favavau lava. Amene." Iuta 1.24-25.

